

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 3451 del 19/11/2025

Dai 27 de november 2025 ai 09 de jené 2026 se pel se scriver ite

Fèr l an de scola a la foresta fora da la UE: l é stat aproà i criteries per la conzescion di stipendium

[Ladino] La Jonta provinzièla l'à aproà l Avis per la conzescion di stipendium per jir a fèr percorsc de scola a la foresta te Païjes fora da la Union Europeèna. L é na scomenzadiva outa ai studenc e a la studentes del terz an de scola auta, o del secondo an de istituc de istruzion de scola auta - de cater egn - de secondo livel, che vel fèr n semester o dut l an de scola a la foresta.

“Chesta scomenzadiva, finanzièda duta con ressorses provinzièles, la fèsc pèrt en dut e per dut de noscia Strategia provinzièla per l'istruzion. Volon renforzèr la competenzes plurilinguistiches di studenc percheche a nosc veder la valorisazion de l'identità culturèla, economica e sozièla del Trentin la passa ence très la capacità de se confrontèr con realtèdes e cultures de dut l mond. Tel medemo temp, volon sostegnir e didèr smaorèr la esperienzes formatives a la foresta, ajache les é fondamentèles tant per la crescimonia personèla che per l svilup de competenzes che serf tel mond del lurier”, la sotrissea l'assessora a l'Istruzion Francesca Gerosa.

DESTINATÈRES

L vegn ametù a la scomenzadiva i studenc e la studentes che:

- te chest an de scola 2025/2026 i/les fèsc la clasc seconda di percorsc de istruzion de la scoles autes – de cater egn - o la clasc terza di percorsc de istruzion de la scoles autes - de cinch egn – te istituc scolastics taliegn;
- **no i abie passà i 20 egn canche va fora l di del termin pervedù per manèr ite la domana;**
- i é enciasé te la Provinzia de Trent;
- i fèsc pèrt, aldò del livel de condizion economica, de na familia col valor del ICEF “Familia” che vegn cà aldò de la
- Declarazion di redic e del patrimonie 2024, calcolà a peèr via coi 15 de setember 2025, valif o sot 0,83.

OLÈ

An de scola te n Stat fora da l'Union europeèna.

REGNÈDA

La regnèda del percors del an de scola la pel esser de dut l an (amancol 240 dis) o per na pèrt (amancol 110 dis).

PORTÈR DANT LA DOMANES

La domana per l stipendium la cognarà vegnir manèda ite, demò trè prozedura online, **da les 10.00 de en jebia ai 27 de november 2025 a les 12.30 de en vender ai 09 de jené 2026**, diretamente dal sit www.provincia.tn.it.

L paament del stipendium soradat l é sotmetù al vincol de aer fenì l an de scola 2025/2026 senza debic formatives.

La sumes metudes a la leta les à l obietif de didèr paèr ju i cos de sojornanza tel temp che l student l va a scola a la foresta. L endrez del percors enveze l resta a cèria del student e de la familia. La sumes soradates les mudarà aldò del Stat forest cernù fora, aldò del percors (anuèl o parzièl) e aldò del indicator ICEF “Familia”.

L import total a la leta de 500.000,00 euro l darà l met de finanzièr zirca cincanta stipendium.

Per informaziuns più avisa l Avis Extra UE se pel l tor ju dal sit: www.provincia.tn.it.

Traduzion di Servijes Linguistics e Culturèi del Comun general de Fascia

(cdt)